

IX. KORRIKAREN AURKEZPENA **Euskaltzaindiaren egoitzan**

MIKEL LABOAREN OMENEZ LIBURUA

1995-03-04

José Antonio Arana Martija,
euskaltzaina

Eguerdi on!

Euskaltzaindiaren izenean bi hitz: Lehen Angelus-eko kanpaiek errezurako deitzen bazuten, oraingoan kanpai hotsek, eguerdi honetan, euskararen aldeko oihua dakarkigute belarri eta bihotzetara.

Mahai inguru honetan gaudenok, eta entzuleok, jakina, oihu hori Euskal Herri osoari nahi diogu zabaldu. Gure hizkuntza nazionala aldarrikatu nahi dugunok Euskaltzaindiaren areto honetan bildu gara, erakunde honek, nolabait, Euskararen ardura nagusia baitarama.

Angel Olalde duzue hemen, mahaian, *Korrikaren* izenean. Pello Urzelai *Eusladunon Egunkariaren* kazetaria, Mikel Laboaren biografia prestatu duena. Mikel Laboa, bera, zeini omenaldi gisa eskaintzen zaion aurkezten den liburua. Eta Jose Maria Sors, Elkar argitaletxekoa.

“Kalera gaitezen euskaraz!” da aurtengo Korrikaren mezua. Baserriko txokotik irten eta hirietara euskara modernoa egin eta atera behar dugu, edozein gai erabiltzeko hizkuntza nazionala, hain zuzen.

Eta horretan ari da AEK: euskara irakasten eta hedatzen, gure Herriaren sentipenak gartsuki adierazteko hots ozena, deiarar itxaropentsua iragarri eta aldarrikatu nahi duena. Mila esker AEK-ri euskaldunon aldetik.

Mikel Laboaz zer esan! Musikan ildo zaharretan gerorako ereiten ari den kantaria, lehengo eta oraingo herri-musikaren zubia, herri-musikaren erroetatik gure oraingo eta geroko arbolaren lorak ernetzen ari dena. Zuri ere, Mikel, bihotzez agurra eta eskerra.

Besterik ez. Ongi etorriak zaretela atek zabalik dituen Euskaltzaindira.